

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U VISOKOM  
Broj: 41 0 K 100564 24 K  
Visoko, 04.07.2024. godine

## U IME FEDERACIJE BOSNE I HERCEGOVINE

Općinski sud u Visokom, sudija Hana Hajdo-Ferhatović, uz sudjelovanje zapisničara Nikoline Mišković, u krivičnom predmetu protiv optuženog Š.K., zbog krivičnog djela Nasilje u porodici iz člana 222. stav 2. u vezi sa stavom 1. Krivičnog zakona Federacije Bosne i Hercegovine, rješavajući po optužnici Kantonalnog tužilaštva-tužiteljstva Zeničko-Dobojskog kantona broj T04 0 KT 0055238 23 od 05.01.2024. godine, nakon održanog javnog i usmenog glavnog pretresa, u prisustvu Kantonalne tužiteljice Andreje Božičković, optuženog lično i njegovog izabranog branioca Hadžić Admira, advokata iz Kaknja, u nastavku glavnog pretresa, dana 04.07.2024. godine, donio je i javno objavio

### PRESUDU

Optuženi: Š.K., sin S. i majke N. rođene K., rođen ... godine u S., nastanjen u ulici V. bb, općina B., pismen, sa završenom SSS, po zanimanju mašinovođa, zaposlen u „R.“ B., razveden, otac jednog mladb djeteta, vojsku nije služio, ne vodi se u vojnoj evidenciji, po narodnosti Bošnjak, državljanin BiH, srednjeg imovnog stanja, JMB: ..., neosuđivan.

Kriv je

što je,

tokom 2023. godine, u B., u kući koja se nalazi u ulici M.K. bb, u kojoj živi u zajedničkom domaćinstvu sa suprugom Š.A., vršio nasilje nad istom na način da je vrijeđao govoreći joj da je kurva, psovao joj mrtvu majku, prijetio da će snimati kao „Sulejmanović iz Gradačca“ kada je bude ubijao i da je „taj Sulejmanović mila majka za njega“, davio je i pesnicom udario u predjelu desnog ramena, da bi dana 24.09.2023. godine istoj govorio da je kurva, te tepsiju koja je bila ispred A., a u kojoj se nalazila hrana izbacio kroz prozor, nakon čega je A. zadao jedan udarac pesnicom u predjelu čela kada je A. vičući tražila da je ne udara, te u strahu za svoj život istrčala iz kuće moleći za pomoć komšinicu odakle je i pozvala policiju, svjestan da će na taj način ugroziti mir, tjelesnu cjelovitost i psihičko zdravlje svoje supruge Š.A., što je i htio, na koji način je nasiljem, drskim i bezobzirnim ponašanjem ugrozio mir, tjelesnu cjelovitost i psihičko zdravlje svoje supruge Š.A.,

čime je počinio krivično djelo nasilje u porodici iz člana 222. stav 2. u vezi sa stavom 1. KZ F BiH.

Pa sud optuženom na osnovu istog zakonskog propisa te na osnovu članova: 42., 49. i 62. Krivičnog zakona Federacije Bosne i Hercegovine, i z r i č e

## USLOVNU OSUDU

Kojom se optuženom Š.K.u za počinjeno krivično djelo utvrđuje kazna zatvora u trajanju od 6 /šest/ mjeseci, a koja se neće izvršiti ako optuženi za vrijeme od 1 /jedne/ godine, od dana pravosnažnosti presude, ne počini novo krivično djelo.

Na osnovu člana 202. stav 1. u vezi sa članom 199. stav 2. tačka g) Zakona o krivičnom postupku Federacije Bosne i Hercegovine, optuženi je dužan platiti sudu na ime troškova krivičnog postupka u vidu paušala 20,00 KM, sve u roku od 30 dana, po pravosnažnosti presude pod prijetnjom izvršenja.

Na osnovu člana 212. stav 3. ZKP FBiH oštećena se sa imovinsko pravnim zahtjevom upućuje na parnični postupak.

### Obrazloženje

Kantonalno tužilaštvo-tužiteljstvo Zeničko-Dobojskog kantona (u daljem tekstu KT ZDK) optužnicom broj T04 0 KT 0055238 23 od 05.01.2024. godine optužilo je Š.K. da je počinio krivično djelo Nasilje u porodici iz člana 222. stav 2. u vezi sa stavom 1. Krivičnog zakona Federacije Bosne i Hercegovine (u daljem tekstu KZ FBiH).

Na glavnom pretresu dana 04.07.2024. godine, prije izvođenja dokaza, optuženi Š.K. priznao je krivnju za krivično djelo Nasilje u porodici iz člana 222. stav 2. KZ FBiH, a njegovo priznanje je u saglasnosti sa dokazima u koje je sud izvršio uvid i to: nalaz i mišljenje ljekara specijaliste JU Dom zdravlja Breza broj: 8329/23 od 24.09.2023. godine na ime Š.A., rješenje Općinskog suda u Visokom broj: 41 0 Pr 099252 23 Zm od 25.09.2023. godine, akt JU Centra za socijalni rad Breza broj: 02-31-6332023 od 17.10.2023. godine, akt PS Breza broj: 08-02-09/3-2-03-2-2696/23 od 30.11.2023. godine, zapisnik o ispitivanju osumnjičenog Š.K. PS Breza broj: 08-02-09/3-2-312/23 od 25.09.2023. godine dat u prisustvu branioca, dva zapisnika o saslušanju svjedoka Š.A. PS Breza broj: 08-02-09/3-2-368/23 od 25.10.2023. godine i Kantonalno Tužilaštvo Ze-do kantona od 27.12.2023. godine, zapisnik o saslušanju svjedoka A.Z. P.S. Breza broj: 08-02-09/3-2-311/23 od 25.09.2023. godine, zapisnik o saslušanju svjedoka B.S. P.S. Breza broj: 08-02-09/3-2-424/23 od 29.11.2023. godine, zapisnik o saslušanju svjedoka B.S. PS Breza broj: 08-02-09/3-2-423/23 od 29.11.2023. godine, zapisnik o saslušanju svjedoka K.H. PS Breza broj: 08-02-09/3-2-374/23 od 30.10.2023. godine, zapisnik o saslušanju svjedoka K.M. PS Breza broj: 08-02-09/3-2-389/23 od 08.11.2023. godine.

Sud je, takođe, izvršio uvidu u izvod iz kaznene evidencije za osumnjičenog Š.K. MUP Kantona Sarajevo, Uprava policije od 18.10.2023. godine, a koji dokaz se tiče izbora vrste i visine krivičnopravne sankcije.

Odbrana nije imala dokaznih prijedloga niti je prigovarala izvedenim dokazima.

Sud je priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u cijelosti potvrđeno sa iskazima saslušanih svjedoka, a koji iskazi, kao i priznanje okrivljenog su u saglasnosti sa materijalnim dokazima, naprijed navedenim, naročito nalaz i mišljenje ljekara specijaliste JU Dom zdravlja Breza broj: 8329/23 od 24.09.2023. godine na ime Š.A., u koje je sud izvršio uvid, a koji dokazi po svom vjerodostojnom značaju potvrđuju priznanje optuženog, na osnovu čega van svake sumnje

proističe da je optuženi ostvario sva bitna obilježja bića krivičnog djela Nasilje u porodici iz člana 222. stav 2. u vezi sa stavom 1. KZ F BiH.

Po ocjeni suda optuženi je navedeno predmetno krivično djelo učinio direktnim umišljajem jer je bio svjestan svog djela i htio je njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predloženim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela Nasilje u porodici iz člana 222. stav 2. u vezi sa stavom 1. KZ F BiH.

Odlučujući o vrsti sankcije za optuženog sud je od olakšavajućih okolnosti cijenio da je optuženi priznao izvršenje krivičnog djela u cijelosti i time doprinio rasvjetljavanju utvrđenog činjeničnog stanja, materijalne i porodične prilike optuženog, da je neosuđivan, zaposlen u R. B., da se kaje, dok otežavajućih okolnosti na strani optuženog sud nije našao, pa je sud optuženom za navedeno krivično djelo utvrdio kaznu zatvora u trajanju od 6 /šest/ mjeseci, sa vremenom provjeravanja od 1 /jedne/ godine, a sud cijeni da će se sa uvjetnom osudom i ovakvim rokom provjere, kako je to navedeno u izreci presude, ostvariti svrha kažnjavanja predviđena članom 42. KZ F BiH (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), te postići potpuna kako posebna tako i generalna prevencija.

Na osnovu člana 202. stav 1. u vezi sa članom 199. stav 2. tačka g) Zakona o krivičnom postupku Federacije Bosne i Hercegovine (Službene novine FBiH broj 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13 i 59/14), sud je optuženog obavezao da plati na ime troškova krivičnog postupka u vidu paušala 20,00 KM, sve u roku od 30 dana, po pravosnažnosti presude, čija visina je određena s obzirom na dužinu i složenost krivičnog postupka.

Na osnovu člana 212. stav 3. Zakona o krivičnom postupku Federacije Bosne i Hercegovine (Službene novine FBiH broj 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13 i 59/14), sud je oštećenu sa imovinsko pravnim zahtjevom uputio na parnični postupak, jer podaci krivičnog postupka ne pružaju pouzdan osnov niti za djelimično niti za potpuno presuđenje.

Sudija  
Hana Hajdo-Ferhatović

#### PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.